

Kesakitan bukan penghalang saya mendaftar di UMP

– Fazliani



Walaupun terpaksa berkerusi roda untuk bergerak, ternyata ia tidak menghalang Fazliani Hairuman, 20 untuk mendaftar sebagai pelajar baharu di Universiti Malaysia Pahang (UMP) bagi Sesi Pengajian 2009/2010 pada 28 Jun 2009 baru-baru ini.

Fazliani yang patah kaki kirinya akibat kemalangan nahas jalan raya di Sepang, Selangor pada Mei yang lalu hadir ditemani ibu dan bapanya.

Beliau yang tetap bersemangat seperti pelajar baharu yang lain merupakan anak peneroka di Felda Jengka 20, Maran.

“Walaupun menghadapi kesukaran untuk bergerak, saya bersemangat untuk mendaftar dan tidak menjadikan kecederaan yang dialami sebagai alasan untuk tidak hadir.

“Malah, saya juga akan menyertai Program Minggu Induksi Siswa (MINDS) yang diadakan selama seminggu,” katanya yang bakal mengikuti pengajian dalam bidang Ijazah Sarjana Muda Pengurusan Projek dengan Kepujian di Fakulti Kejuruteraan Pembuatan & Pengurusan Teknologi (FKPPT).

Tambah beliau lagi, kegembiraan menerima tawaran belajar di UMP menyebabkan kesakitannya seakan-akan hilang.

“Semasa menerima surat tawaran, saya hanya fikir akan pergi daftar sahaja kerana tidak mahu terlepas peluang.

“Sekarang saya rasa lega kerana telah selesai mendaftar dan tidak sabar untuk menghadiri kuliah,” kata bekas pelajar Kuliyah Al-Lughah Waddin Pekan ini.

Jelas anak ketujuh daripada sembilan adik-beradik ini lagi, beliau teruja untuk mengikuti pengajian di UMP kerana kursus yang ditawarkan kepadanya berbeza dengan alirannya sebelum ini.

“Sebelum ini saya belajar aliran agama dengan memiliki Sijil Tinggi Agama Malaysia (STAM) yang mana jauh dari bidang yang ditawarkan.”

“Tetapi itu bukanlah penghalang untuk saya belajar bersungguh-sungguh untuk mengejar cita-cita saya iaitu berjaya dalam apa jua bidang yang diceburi,” katanya ketika mengakhiri perbualan.

“Semasa menerima surat tawaran, saya hanya fikir akan pergi daftar sahaja kerana tidak mahu terlepas peluang.”